

A ogni frut il so biel librut: colorât, divertent e... dut par furlan

Cressi cun plui lenghis

La leture a vôs alte bielzà dai prin dîs di vite e il contat cui diferents sunôrs des lenghis - di cjase, dal teritori, de scuele - a àn un efiet positîf sedi dal pont di viste relacionâl, puartant a infuârî il rapuart gjenitôr-frut, sedi di chel cognitîf. Lu disin a clâr i pediatri e i ricercjadôrs che a consein di meti i frutins daurman a contat cu lis lenghis, scoltant cjançons, leint storiis a vôs alte e creant simpri gnovis occasions par sostignî il lôr disvilup neurologjic e afetîf. Par ducj chescj motîfs la Agenzie Regional pe Lenghe Furlane e à invistît tai ultins agns pe promozion e pal disvilup de editorie pe infanzie in lenghe furlane. Intes librariis dal teritori a son disponibilis dîs gnûfs titui dedicâts ai fruts di variis fassis di etât, risultât de colaborazion fra la ARLeF e lis cjasis editoris locâls. Une produzion editoriâl di grande cualitât cun storiis divertentis, contignûts modernis, une lenghe une vore curade e ilustrazions e grafiche cetant originjals: lis golainis, za ae seconde serie, a son pensadis par incressi l'interès dai fruts no dome ae lenghe furlane ma ancje ae leture: parcè che lei al è divertent e al jude a cognossi il mont. Cu lis gnovis jessudis, i frutins plui piçui a puedin divertîsi leint lis storiis di "FREE&ULLI" (Futura Ed.), une moscje cetant simpatiche e un elegant crot inglès che, insiemi a Schwarz, une furmie todescje, a zuin e a ridin dut il dì. Fats di Patrizia Geremia, cun tescj curts e sempliçs, colôrs legris e vivarôs i cuatri gnûfs titui, "Stagjons", "Colôrs", "Pomis e verduris", "Piçulis voris",



a puartin i fruts te lôr quotidianità e dentri de realtât multilengâl de region. Simpri pe stesse fasse di etât e son po daspò lis storiis aventurosos e coloradis di Gjat UT e i siei amîs, te golaine "A OGNI FRUT IL SO LIBRUT", ideadis di Deborah Crapiz e Doriana Alessio (Corvino Ed.): cun tantis imagjins e tescj graduâi di lei in: "Ce fasino i amis di UT?", "AUTun" e "MusicUTE". De serie di Gjat Ut si cjate in vendite ancje il zûc dal MEMORY stampât de KappaVu che e à ancje realizât "Vanilie e soreli" e "Doi nonos scompagnâts" i doi gnûfs librets, par fruts plui grancj, de golaine "FAMEIS". A son lis storiis des fameis furlanis dal dì di vuê, ilustradis e pensadis di Francesca Gregoricchio che, midiant di une scriture delicade, ironiche e divertente e conte i diviers mûts di jessi

famee inte societât contemporanie. L'Orto della Cultura al è infin in librarie cul libri "MA PAR FORTUNE" curât di Sandra Fabris e di Renata Gallio che al fâs part de golaine di libris ilustrâts premiâts al Concors internazionâl "Syria Poletti" e realizâts inte version in lenghe furlane. Ducj i dîs libris, adun cun chei altris de prime serie, si puedin comprâ tes librariis dal Friûl o domandâ tes bibliotechis dal teritori.

E alore...frutins, gjenitôrs e mestris, ce spietaiso? La leture e fâs ben al cerviel, al cûr e ancje aes lenghis!

Pagjine par cure de ARLeF Agenzie Regional pe Lenghe Furlane

ARLeF AGENZIE
REGJONÂL
PE LENGHE
FURLANE